

摘藻堂四庫全書薈要

集部

欽定四庫全書薈要

集部  
文獻集卷七上



詳校官助教臣謝登雋

欽定四庫全書薈要卷一萬六千四百十二

集部

文獻集卷七上

元黃潛撰

記

湖州路總管府題名記

諸侯之國必有史官太史公始撫其所述年經而

國緯之合以為表蓋將使有民社者幸而覽觀焉必且  
曰某年為何時某侯為何人而我何如也自秦置郡縣  
既不容有私史猶幸有所謂題名者而可闕與吳興為

郡曰內史曰太守曰刺史曰知州事由晉王羲之而下  
凡若干人亦既列其氏名于貞石矣粵自聖化南被國  
家遴選仁哲以惠幸茲土者聲相聞迹相接而迄未有  
所登載也今總管某公始合長貳立石為題名而屬予  
以記予惟題名之設本以昭歲月辨爵秩觀其氏名與  
其所以去來而其人之賢不肖可知也善善惡惡而懲  
勸存焉此太史公之深旨而春秋之微權也昔司馬文  
正公記諫官題名而繫之以忠詐回直之日使來者知

所避就嗚呼豈獨諫官也哉

山南先生集後記

右山南先生集凡二十卷記曰辭必已出古也騷不必如詩玄不必如易而太史公書不必如尚書春秋十三國風之作大抵發乎情矣然而止乎禮義發乎情故千載殊時而五方異感也止乎禮義以天地之心為本者也其為本不二故言可得而知也有如先生之闕材傑志百不一施而其言猶莫為世所貴則言豈誠易知哉

蓋先生自少時為舉子業已能知非之逮其年邁而氣益定支離之習刊落盡矣故其為文逸出橫厲譬如風雨之所潤動雜葩異卉不擇地而輒發人見其徜徉恣肆惟意所之而止耳世之善為近似者方竊竊然揣量剽掇譁衆以立的而曰吾古學也陳性命者躡幽微辨名數者殫豪末而先生之文過而不行矣孰知夫繇繇儻儻浮沈俗間其自視吾言蝸甲爾蛇蛻爾豈復累於稱譏者耶潛受學於先生最久且親誠悼其餘芳溢流

無所記以被于後乃因先生所自序夢稟癡稟聽雨留  
稟者合而一之目曰山南先生集嗚呼是其為言也非  
出於古非不出於古也夫能不二於古今而有不以天  
地之心為本者乎綿千禩貫萬彙而無遷壞淪滅者莫  
壽於是物矣區區之篇牘尚奚為哉姑用以致吾意焉  
爾先生之氏名與出處大槩潛既為之述茲不復云

明正書院田記

宋南渡後衢之先賢忠簡趙公而下六人蓋尸祝之舊

矣景定末王侯已守是邦始諗于朝即故吏所據祠地為道院者闢書堂曰明正且以其沒入之田百七十有六畝隸焉咸淳間繼之者趙侯孟奎又益以它田六十有三畝祠事以備國朝因之建書院額設山長員而茲田之奪於浮屠老氏者什七八有司漫弗加省也皇慶初上親即位垂意庠序之事凡田之在學官者冒取有禁於是總管申侯為閱累歲之訟牒而覈其實悉返所侵田有挾教門檄來爭之者侯弗為動乃賂吏瞰侯在



告謬為可疑上其事于宣閩今山長葉君謹翁白侯破  
其計而閩復下于郡侯為徵圖籍覆按具有本末田以  
卒歸蓋九十年間祠三徙而始有田不二十年遽失不  
守又三十餘年廼復葉君念其得之難而保有之不易  
也求書于石以圖永久潛竊惟三代而降師廢民散儒  
失其守而奪於二氏者匪直吾疆畎而已矧夫威怵利  
誘有甚於二氏者乎嘗試觀馬公之在建炎連柱大斡  
一斥終其身不悔逮紹興權臣擅事汪公既坐切直擯

弗用趙公竟以不苟合去相位貶且死至若范劉小汪  
公委蛇仕止之間又莫或少自撓是廩焉不可奪者區  
區之土壤猶外物也賢師帥祇奉德意幸惠斯文甚厚  
繫六君子之胄若士之從葉君登斯堂者敬共以承事  
感慕而振飭必有名入傑出其間媲美於前哲夫能寶  
其不貲之軀則一物之細有不難守矣潛既為書其槩  
且道其所望於諸君如此初田之未復也劉公五世孫  
衍嘗以已田百畝代其匱汪公五世孫諠亦以已田三

十畝相馬至是兩家因捐其田戒子孫勿復有是抑可  
書已申侯名伊埒特穆爾高麗人

### 上海縣學田記

上海由鎮為縣之三年縣始有學又十年學始有田又  
九年乃改作學于縣東如干步延祐元年冬張侯如砥  
來涖縣事厥既延見諸生視其居則齋廬未備也庖廩  
未充也按其籍則田之析於郡庠若出於是邦之寓公  
者歲為米不盈四百石惕焉深懼士失其養而學政之

弗舉謀大其規制為久遠計而未知所出也上人善能者聞之請入私田四百九十五畝有奇為學官永業以佐經費侯既納其請則白狀于縣而輸券于學主教事者方君遇以為向之克有學有田不易如此而上人一念之頃遽能不愛其所有以弛吾乏絕之慮是不宜使後之君子無述也乃伐石來徵文為記嗟乎大道隳裂九流百家之異趨久矣是果不可同歟易稱同人于野亨而謂同人于宗吝夫與善不擇其類致亨孰大焉施

惠而不私其黨去吝孰先焉由其通舍其蔽茲所以合  
異而為同也侯與吾從其有取乎此矣上人亦嘗學於  
是耶土地之利其末爾竊獨嘉乎是舉也庶幾乎吾聖  
人之旨而有非苟同者故為原其大趣而為之記其目  
之細則碑陰存焉

常熟州學田記

常熟故吳地州之西子游宅在焉當孔子時吳通上國  
已久北學宜非一人獨子游以身通受業列於七十有

二人之間而其言行見於記錄為甚具迄今千有七百餘年生其地而好學能文者猶彬彬焉風氣之厚俗習之盛誠非旁州比縣之所及然自其為縣時已有學而所占田多薄瘠以歲之不易也諸生徃徃無所仰食學校之養顧出它州縣下弦誦之聲希闊寂寥前後為是州若職教事者思有以裕之而未知所以為計學之賓老以為州之有力而名好事莫如曹君乃相率造君以為言君欣然為輟田之可耕者若干晦山之可樵者若

千畝以佐之士之羣居聚食始無所乏絕莫不德君之  
為而願得予文以記之予聞古昔授田建學悉有成法  
民之為士固不必廩於學宮而大家巨室亦不得有羨  
田以資施予也自先王之法壞而不可復見說者蓋以  
為三千之徒聚而食於孔子或又以飲食之人為子游  
氏之儒何言之無稽耶今之去孔子日益以遠有能聞  
布衣養徒之事而興起焉可謂難也已若夫為弟子員  
而歲修息游於斯者皆生於子游之鄉而得其風氣俗

習之美者也苟無幸乎居之安食之飽而必有事焉將見其處也必無媿乎子游之文學其出也必無忘乎子游之學道而愛人一簞一瓢不足為其儉萬鍾之祿不足為其泰孰得以區區飲食之細厚誣君子也哉是用弗讓而為之記以告諸來者云爾曹君名某嘗為某官

東陽縣門樓記

古者國無小必為臺門所以嚴等威重教令非苟致崇飾而已也以為不若是無以習民於上下之分而壹其



觀聽也古今殊時郡國異體所謂麗譙者不皆出諸侯  
三門之制其以樓易臺或猶有取禮之以高為貴者乎  
春秋譏新作南門非謂夫修舊而加其度也蓋失時也  
東陽發壯縣提封幾二百里民堵至四萬區不啻如古  
子男國縣署之大門故有樓庠仄下陋歲久且就圯丞  
耿君某以為是不稱古者嚴等威重教令之意爰合其  
鄉之大家俾撤而新之尋有二尺以為基之崇參其基  
以為屋之崇修去屋崇五尺廣參其修而益五尺凡修

廣視舊率加什二而崇倍焉為間者五而加其舊者二  
焉君之惠孚于人故民樂獻其力智周于物故工喜薦  
其伎始作於延祐二年冬十月而訖役於三年春二月  
又不失乎土功之時是宜舉之易成之亟也學校之士  
咸相與言吾黨不可拱手視具乃買石而以書來曰吾  
耿君之興壞起廢可稱述者非一而樓為大願紀成事  
來者尚有考也潛不佞無能贊美頌勤然竊觀是役也  
有禮之貴而無春秋之譏能勿喜聞而樂書之哉動而

法於禮春秋則夫所宜書者茲樓云乎哉程工屬役之  
凡庸可畧也

松陽縣惠洽巡檢司記

處之松陽所部六鄉其一曰惠洽至元某年始置巡檢  
其地以教官而假巡檢則自吾岳君始先是居其官者  
凡若干人咸即寓舍以為治所卒伍散處墟落間緩急  
呼調輒後會期莫有以為意者至治二年冬十月君實  
來明年秋某月始買地作新廨為屋以間數者若干費

錢若干而其什七出於君之私橐不足則其吏士洎鄉之大家合力以成之又明年冬十有二月功以訖告門廡堂室器械之湏靡不具完君既諏日之吉入據廳事而休吏士于旁舍廼以書來曰願有紀俾後之人勿廢也夫尉巡檢均以求盜為職而尉得與令長連署常治其邑中巡檢所治率在乎荒郊林莽山區海聚幽昧曠絕之境其為力眊尉難矣矧處為山郡而介于甌越國家初定南服患其竊發之不時也嘗選用重臣建牙分

聞以涖焉雖以積安日久而椎剽之習或未盡去巡檢  
之為力不加難乎是以來者幸其苟逭於吏議則望望  
然計吾歲月而去之固無以居處之崇為也君儒者按  
職甫及期枹鼓不驚而田里之人甘食以安寢又能致  
其餘力以樹立官府如此向之所謂難者君直易處之  
其設施之整暇何如哉是有政焉非特土木之功而已  
世恒譏儒者迂且憚事若君之為武夫俗吏不可少媿  
耶為之記所以昭作始之自亦所以釋儒者之譏也君

名自修字德敏宋太師鄂忠武王五世諸孫今為常之  
宜興人

平江西虹橋記

泰定元年冬十有二月庚午平江閭門外新作虹橋成  
古者辰角見雨畢而除道天根見水涸而成梁有司之  
常事耳春秋之法常事不書此何以書在有司常事也  
而此非有司之常事也按郡志橋之載於圖籍者三百  
五十九而為虹橋者三其一在城四若干步即此橋也

去年夏大雨水暴溢橋居兩水之交所施材甃皆腐缺  
莫能與水抗一夕盡圯其地適控通衢凡徵令賜予布  
政於方國若奉貢輸賦修職于京邑者悉由是而之焉  
執事者奔走迎勞無虛日懼舟楫不足以嚴使客則棧  
木以竢之方謀所以復其故而官帑不可輒發又重以  
其役厲民未知費所出郡民鄧文貴聞之請分家貲之  
半更為石橋以利永久既又以為此有司者之事非細  
人所得干也乃飭材用庀工徒以聽要束焉事聞于府

府上之行中書已而報如其請遂以八月乙丑始事閱  
八甲子而告訖功橋之修四百尺而其高十分修之一  
五分而殺其二乃與岸等脊之廣得高之半而趾之廣  
加其什伍上設扶欄為之周陞其下為門如半月以醜  
漕河而隄其兩垂以度輓者所用錢以緡計者十二萬  
五千有奇役以庸計者二萬四千有奇今總管郭公既  
率僚屬觴酒橋上以落其成且謂文貴編戶民非有名  
田稍食貨殖奇贏若它大姓比川梁達路官實領之而



文貴顧能輟其衣食之餘以紓有司之急不宜無以示  
勸相乃伐石俾潛執筆書其凡而刻焉夫以一夫尸利  
物之功而長民者能表樹之以寓其風厲之意是皆有  
司常事之所不及而於法宜書者潛不得辭也傳曰一  
家仁一國興仁一家讓一國興讓是邦之人誠知所感  
發而慕效焉則夫可以修廢舉墜而出於有司常事之  
外者其屢書不一書尚託始於茲橋也文貴之可稱道  
而不繫於橋事者茲不書

諸暨州鄉貢進士題名記

晉佐諸暨之明年州人士有同升於春官而旅進於天子之廷者其調補而歸也學正陳繼龍既合鄉薦之士為題名而虛其左以俟且屬晉記之晉惟國朝以科目取士著於令列聖相承守之如一上以繼志述事下以立邦家太平之基甚盛德也越於東南號稱都會異時人材輩出起進士至宰相者有之自版圖入職方章逢之流相與蹈詠為日已久如種待穫適惟其時是以詔

下之日莫不爭翔競奮以自廁於英雋之列獨是州閱  
十年而偕計吏第奉常者始接踵而起後先相望茲不  
乏人其科級之優又旁州比縣所未有也惟其發也不  
亟故其就也愈偉則其進也孰禦焉雖然士非科目不  
能以自達至其措諸行事足以被今而垂後者恒有在  
乎科目之外苟徒誇榮侈盛而以為稽古之所蒙豈賢  
師儒昭示上德風厲學者之意哉肆成人有德潛與諸  
君子求無忤焉可也小子有造潛於承學之士蓋日望

之

鄞縣義役記

浙水東州縣隸慶元大府者六凡所入田租鄞以一縣當其什五諸名額及非時之須稱是取民為最夥而其為縣在鉅海上號東南一都會牧伯守將若它司以轉漕市易鹽筴之利有事于海者悉蒞治其處一切趣辦用民為最繁富者巧自辟匿貧者日削而弗繼吏鯁鯁焉惟期會之或後為懼而公私交病矣天台周君之為

承也會國家申嚴役法豪右以它名數自占者毋敢弗  
與周侯進父老具宣德意且教之為義役於是縣西南  
五十里林村之民次當受役者三十有五家首相與謀  
眡物力之薄厚各捐已橐得錢七千五百緡為子本推  
執事者五人操其奇贏以供百役之費而存其母常勿  
絕復推其五人日詣有司以聽徵令歲終則更休焉厥  
既條上于縣周君合長佐白狀大府而定其要束因廷  
酌父老以為衆勸旁鄉比井爭慕為之其致力也均其

待事也易姦胥悍卒不得舞手其間而民益忘為役之勤其效可睹矣周君以秩滿去父老過予而請曰願有紀庶幾夫嗣為政者知有以相之俾後之人毋棄其成也昔者孔子稱子產使民也義夫義也者固古之所以使民也今也田里之人不愛其力相率以聽於有司而謂之義役非上之人以義使之而能然哉是蓋子產之所以為鄭而孔子之所與也其孰得而廢之然則可託以永久者有不在予文矣周君名仔肩延祐五年進士

其來以七年二月而義役行於至治元年正月其去以三年三月云

傅氏義田記

烏傷之北鄙有義門者里人傅氏之居也傅氏之長曰某過予而言曰家故有田四百畝合族而食五世矣以羣從子姪之蕃衍也歲率用八畝之入食一人而籍其餘可當十人之食以給賓祭百須之費吾懼夫久且弗繼而無以善其後也吾竭吾私焉耳矣蓋得田凡若干

晦別儲其入為子本而權其奇贏俟它日更購田以附  
益焉是不可無告來裔使成吾志以惟子也請嗟乎義  
之名孰從生乎親親仁也因時制宜義也禮之所由起  
也蓋予聞之古之制禮者為之井田以同其利為之比  
閭族黨以均其安夫然後教以有急相賙有喜相慶死  
喪相卹疾病相養猶患其未足以勸親親也於是乎有  
宗子法而非會居聚食之謂也服窮于緦而同姓殺于  
袒免是以祖遷於上聖人莫能存也宗易於下聖人莫



能止也戚也而日以䟽勢也繫之以姓而弗別綴之以食而弗殊則是䟽可使戚也其所因者本也循其勢故教易行達其本故道可久聖人惡有術以強合之哉大雅曰食之飲之君之宗之王者之大政也田制壞宗道廢仁人孝子不得由乎先王之禮之盛而各以意行之假區區生養之具以收聖人之所不能合夫亦有取其義云爾也充其義而仁不可勝用也記曰一家仁一國興仁一家讓一國興讓在乎勿替引之而已書而歸之

俾刻諸石豈非有所望以扶吾義於百世而弗墜者耶  
旌異之實存乎舊記條約之凡具于碑陰茲不書

潛窩記

剡源先生嘗題其居曰縮軒從之遊者陳君養直亦以  
潛窩扁其宴休之室君之云云則有所受之矣蓋縮之  
為言退也潛之為言藏也是固以世為莫足用吾聰明  
而務為退藏者也古之善為退藏者豈隕然伏其身宵  
然閉其言而已哉昔者先生方盛壯時高視闊步英雋

之林舍者必避席煬者必避竈庸人小子却立而睨之  
如萬斛之舟順流而東騏驎騶裊繭浮雲而上也可謂  
進耶退耶一旦倦游而歸逡巡乎山硯海涯而時出以  
浮沉俗間所居而屨滿於戶外矣鴻聲駭望羣起水涌  
庸詎知夫退之非進耶惟夫不為物首而墨以為守是  
以恒瞳若乎人之後不知孰吾進孰吾退而吾未始與  
之俱進退也君之於先生則幾矣然而未嘗進也惡乎  
退未嘗行也惡乎藏顧獨弊弊焉於其名迹之間是將

有闕其藏者矣夫湛盧豪曹固不斬一割之用其光氣  
燦然星辰之上者雖千仞之土有未易以揜遏也善刀  
而藏亦有其道乎誠有莫吾用而未始不行莫吾舍而  
未始不藏者則其退藏也斯密矣而予安能知之安能  
言之

懋懋齋記

天台項君可立甫周君彥德甫俱以懋懋名其齋今國  
子祭酒集賢鄧公各為之大書其顏蓋以旌其志之同

也二人者復俾予合為之記以繹其義焉夫慥慥者所以美中庸之君子言與行相應者也而齋也者謂夫閒居以養其心若於此而齋戒也方二人者各適其安而喏焉以休言不與物交也行不與事接也惡睹所謂慥慥者哉蓋人之感焉而易動者物也其來無時而常使人善惑者事也揆事物之理以酬酢萬變而不窮者人之心也平居養之無其素一旦出而卒然與夫事物遇易動者或怵之善惑者或眩之口之於言身之於行有

不暇擇也其無繆迷而顛錯者幾希二人者誠深知乎此故其晝談夕講之隙退而即於私室各著其志以自儆焉此中庸屋漏潛伏之功古之君子所以成其慥慥之美者未始不出於此也在易風自火出其卦為家人其象為君子以言有物而行有恒釋之者蓋曰火內也風外也由內以及外是以能有物而有恒也夫二人者求美其言行而圖之於養其心之所內外賓主之辨其審如此豈不可謂知所務矣哉是道也苟知擇乎中庸

者宜無不然而非二人者為獨然也彼慥慥之名又豈  
二人者所得專而有哉書而歸之所以記也亦以厲同  
志也

鄉學記

霸之益津人宮君琪即其西鄉所居作學舍合諸莊子  
弟俾肄業其中且為廟像先聖先賢以春秋旦望奠謁  
如學官法念不可無以示永久爰狀其事走京師請奎  
章閣侍書學士內翰虞公為之記公方有大論譔未暇

如君琪請廼以狀授潛俾執筆而書之潛惟古之施教導民有本有原必由鄉以達於國是以六鄉之吏去民愈近者為教愈詳一歲之中州長之屬民讀法者四黨正七族師十有四而閭胥則無時焉若夫二十五家之閭則又有門塾以仕焉而已者為之左右師雖閭胥弗親也故上之教不煩而民之為士者恒足賴故其詩曰攸介攸止烝我髦士人生其時獨何幸歟今郡邑用著令既咸得立學承宣德意而崇厲之厥有師帥而鄉閭



之教希闊弗講雖有朴茂之質何以培其根而達其支也哉君琪不自耀其材以取顯仕而主昌平之侯館固非有長民者之責廼能汲汲焉圖所以私淑其人如此可謂有志于古矣昔者魯修泮宮而春秋不書說者類曰此有國之常事爾君琪之為盖禮之以義起而出於常事之外者也可無書乎凡廟學總為屋若干楹費錢若干緡經始於至順二年春二月而落成於秋八月翰林直學士趙公子昌與君琪居相望實有以相之其來

請記則冬十有二月也

浦江縣三皇廟記

醫有學三皇有廟尚矣合廟學為一而俾醫師領其祠  
事有司以春秋之季發公帑具祭料而折俎升觴焉今  
制也蓋三墳之書世莫得見可見者非必其本書百家  
所錄又多恠迂鄙野而爽於用能推其所承傳而措諸  
民生日用之間惟言醫者為然耳三聖人開物成務之  
功有託以弗泯其在茲乎凡立學必釋奠于先聖先師

禮也仲尼祖述堯舜憲章文武而其徒無敢推唐虞成周之君以為先聖醫家者流乃得上援羲農黃帝氏而尸祝之希世之盛典與國家仁育庶類將悉躋之壽域垂意於醫事至重而不輕宗廟祀以表章其學著在令式而偏州下邑或不能奉以從事非知為政之緩急者莫肯盡心焉浦江自版圖歸職方踰四十載迨至治初始克有廟於邑署之西南不久輒壞天歷間嘗繕完之而猶未有學也今達魯噶齊巴爾斯布哈以廷對第二

人由中祕外補再轉而長是邑既興學宮以嘉惠章甫  
逢掖之士尋又以為今之建學立師醫與儒等爾隆於  
彼而嗇於此非所以欽承天子之命教也乃捐俸資倡  
衆而改作焉中為殿堂具嚴像設兩廡旁列四墉外周  
前植櫺星門而齋宿之次論說之所無不畢備經始于  
至順三年之某月落成于明年之某月書來屬潛記之  
潛竊惟三聖人之法被於萬世其大庇乎斯人者若天  
覆而地載不可以一事名言也百藥齊和湯火箴石之

施與易大傳所稱網罟耒耜衣裳舟楫白杆弧矢棟宇  
棺槨均之為一事爾其不可明言者孰得窺測而擬諸  
形容哉乃若賢侯之敬恭秩祀道宣靈休不宜無以告  
來者庸弗辭而為之記餘見於舊刻者茲不重出焉

永嘉縣重修海隄記

溫為郡俯瞰大海江出郡城之後東與海合直拱北門  
枕江為亭榜其顏曰四時萬象候館在焉使指所臨長  
吏迎勞無虛日亭之西為市區百貨所萃塵氓賈豎咸

附趨之江滸故有大石隄延袤數千尺舍舟登陸者阻泥淖不得前其俗率於隄之旁為石路外出以屬於舟次為之馬頭凡為馬頭者二一以俟官舸一以達商舶云先是江水過於沙洲由江心寺之西逆流而上勢奔突莫支隄數毀繕治之費公私交以為病至順二年秋水暴溢括蒼山中被郡境颶風激海水相輔為害隄傾路夷亭隨仆永和鹽倉亦圯水怒未已且將破廬舍敗城郭永嘉蓋郡之治所縣尹趙君大訥謂是不可緩急

議興作俾大家之役于官者分任其事或輸以財或薦以力經畫勸相則身親之以潮汐之盈縮有時也投其隙而賦功焉列巨木為柱而設楸施其上內攢衆木圍之三周外施其芒以撥浪次填以石次積以瓦礫而實土其中加橫木備其欹側而帖石其背以便行者隄若路暨亭之址悉如之而亭亦復其故始事於三年之春二月訖役於冬十一月費不益於舊而功倍焉俾來俾記其歲月潛惟春秋之法有直書其事具文見意者敢

竊取斯義敘次梗槩不復效近人之記事謬為諛言以亂其實續郡乘者尚有考於斯

昌平縣石橋記

由都城北抵上京其驛十有二而昌平之為縣當其第一驛谿水逕闌闌中橫絕通衢霖潦暴至則水湍悍益甚人莫利涉縣尹畢侯以為昌平今畿縣大駕時巡次舍在焉凡侍從之臣宿衛之士與夫外頒教令內奉職貢使客傳遽之往來率由乎是為長吏者曷敢弗謹廼



規貨食募匠傭揆日之吉架石為橋其修六十尺而其  
廣得修四之一自始作至訖功為日若干車者無濟盈  
徒者無厲深而民不知有役咸相與誦美之掌其驛事  
者宮君琪持父老之言來諭曰吾畢侯之為人素慎重  
雖居劇縣善操簡以御煩見謂材敏然以廉平不苛民  
樂其業田里安於無事用能以暇日致力於茲橋願有  
紀而附見其治行之槩勒諸岸左以貽永久古者列國  
有四鄰賓客之交入其境而門闕逵路廬館川梁修除

之不時猶或譏其失政矧今百里之郊警蹕所臨有能勤其官敬其事而不忘乎嚴飭具備如此可謂無失政矣豈徒一時興作之功有足稱道哉庸弗辭而為之書善觀政者有考於斯則它治行固可推而知也畢侯名文質濟南士族其出宰也由翊正掾外補云

蘇御史治獄記

至順二年冬十有一月趙郡蘇公天爵由翰林為御史南臺時方用中書奏遣官審覆論報天下獄囚三年春

正月公甫就職即分涖湖北湖北所統地大以遠其西南諸郡民獠錯居俗素獷悍喜鬪爭獄事為最繁公不憚山谿之阻瘴毒之所侵加徧履其地雖盛暑猶夜篝燈閱文書無少勌囚有言其冤狀者公曰憲司歲再至不言何也囚皆曰前此慮囚者應故事耳聞公至當受刑故不得不言公為之太息事無鉅細必盡心焉辰之沅陵民文甲無子育其甥雷乙後乃生兩子而出乙乙伺兩子行賣茶即舟中取析薪之斧並斫殺之既沈斧

水中而血漬其衣跡故在事覺乙具服部使者顧以為  
三年之疑獄而釋之公曰是事二年半耳不殺人何以  
衣有血污何以知谷在水中且其居去殺人處甚近何  
謂疑獄遂復寘于理有龍光祖者買官得同知某州事  
用例奪官家居其子及家奴言胡孫谿有吾家故所請  
射官地而宋某來畊其上今宋已死宜募佃者光祖從  
其言而宋之子乙來爭此地先祖以牛米鹽遺洞蠻使  
與佃人夜持兵圍宋所居盡縛其家人以去佃人指乙

兄甲謂洞蠻曰不殺此人恐走出洞事洩遂射殺之而散賣其妻子於諸洞甲既死乙竟脫歸訴其事吏受賕止以占田坐其佃人寘光祖不問公曰殺人而坐以占田可乎廼諭洞蠻悉出宋家人而正殺人者罪沅之麻陽民張甲彭乙爭溉田水交惡張以禾方熟夜往視之彭適過其處張因殺之而誣以盜禾取其家竹簾實禾為驗吏以為所殺者真盜也將實其罪公曰彼盜汝禾用手取之耶抑用鎌也曰用鎌耳公問鎌安在不能對

乃論如法有黃天發者兄子四人仲獨富而其季性剛  
愎與諸兄數有爭且陵侮天發仲欲殺季乃告于天發  
而以錢與謝某者使共殺之季妻發其事仲謂天發曰  
兄殺弟則罪重叔承之則罪不至死叔婦子某能衣食  
之天發許諾尋就逮自言實出錢與龔某者使殺之龔  
盖仲之舅而其妻則謝之母也仲賂吏如其言文致成  
獄公疑有冤訊之果然廼以始謀者為罪首常德之桃  
源民盧甲莫乙汪丙同出求傭工於人甲誤墮水死甲

弟之為僧者欲私甲妻不得訴甲妻與乙通而殺其夫  
乙不能自明言實與丙同擊之至死慮其復甦斷首棄  
草間而棄尸與伏於譚某家溝中吏往視之果得髑髏  
而尸與伏皆無有公曰尸與伏縱存今已八年未有不  
腐者呼譚問之則甲未死時其目已瞽而謬云曾見一  
尸為水所漂去公知其誣語吏曰此廼疑獄且不止三  
年也卒釋之楊乙者始娶而得悶風疾其妻惡之逃歸  
父母家乙往追取其聘財婦翁以訴于官事未決而乙

於屠者燕甲家見其妻因與甲鬪毆既去而至屠者燕  
丙家責所貸又與丙鬪毆而去中路病發死其母知無  
它而恐官以前事來索之故亟以聞吏不察廼捕繫兩  
屠者治殺人事公問其母得乙風疾狀兩屠者賴以免  
卹社子者聘同里民家女為妻未及娶而周某者耻與  
為婬婿止婦翁使勿嫁社子恨周而殺之楊惠孫黃文  
德皆里中大家故有怨社子本受傭惠孫所又適僦文  
德屋以居文德因嗾社子援楊父子造謀使殺周惠孫



彊服而不能言其故初言周捕其子姦事而殺之次言  
周通其妾而殺之後徙其獄龍陽則又言過洞庭遇風  
禱于神許採生以祭而殺周取心肝祭之公閱其牘曰  
前二說既非是使如後說有尸可驗猶未足信况無尸  
乎及詢得其實則教之自誣者衛推官也於是社子已  
瘐死迺出楊父子破械遣之州人劉文貴死妻弟同郡  
朱德來省其姊文貴養子飲以酒數日而患腹脹文貴  
次子與養子爭家財有隙因謂德曰得非中蠟蠶毒乎

擣烏桕根和酒飲之得暴下視之無它毒而病愈劇德  
歸具以養子言告其母其母以聞于官未及逮問而德  
死錄事及武陵縣官來驗其尸皆以銀釵探口中色不  
變定為病死衛推官者先以他事怒錄事欲假定驗不  
實為其罪更命龍陽知州聚檢作中毒死辭連三十餘  
人養子以誣服公疑有寃為訪諸路人且諭使吐實衆  
皆曰獄辭盡衛推官教我云然公既反其獄併按衛推  
官罷之凡此皆死獄公所平決未有不得其情者也富

者以佃客家人死而蒙非辜公則直其冤貧者以年飢  
取他人穀因擊傷之而傳重議公則薄其罪所活又數  
十百人澧之齊氏沅之曹氏駱氏靖之唐氏並雄於貲  
而善持吏短長為民害齊因湖泊官不聽其撲買而汙  
以他事曹與駱有罪例當施粉壁著其過惡遂藏去省  
檄以滅其跡唐以白身為黃平府判官追奪之令下而  
拒不納公至吏始克舉其法無所避有以婚田來訴者  
公雖歸其事於有司後必詢所處當否即有未當折以

片言莫不心服而去公既召還兩入臺為御史湖北之人思之不寘而士之有文學者太祝周君歷叙其事焉昔者于定國嘗為御史矣而其為廷尉也居十八歲乃遷夫以十八歲之久事之可書者宜不一而足史厯存其父于公爭孝婦不殺姑事而於定國之事一無所登載第稱之曰民自以不寃而已豈非當時軼其傳而史家無述歟竊用是有感於公之事輒因周君所叙刪取大畧為之記以慰其人之思後之秉史筆者或尚有考

也公今由中書禮部侍郎出為江北淮東道肅政廉訪使云

自怡齋記

山林肥遯之士遺世而絕俗聲色狗馬金珠服玩之美舉無足動其意而其意之所樂猶有寓乎草木禽魚煙雲荒忽風月寂寥之間是雖若與世俗異嗜而不相入其不能無待於外則一而已自夫外物者言之金珠草木均之無知也狗馬禽魚均之無識也果奚取奚舍焉

苟無累於取舍則梯稗也螻蟻也瓦甓也萬物之臧臧  
未有不可寓其樂也獨煙雲風月乎哉仁者樂山而未  
始資夫山以為仁知者樂水而未始資乎水以為知君  
子之樂固無待於外也予嘗與客造乎自怡之齋而叩  
其主人之名齋者則華陽陶隱居詩語也噫謂白雲不  
堪持寄而可自怡悅者華陽之戲論爾夫既已遊乎方  
之外矣白雲何物能為之累耶賢主人不愛其重珪疊  
組一旦蟬蛻而去由由然立乎萬物之表盖有不屑為

山中宰相者聲色狗馬金珠服玩安足多道華陽之白雲固不能為之累也今之名齋顧有取乎其自怡之云者是其中必有真樂者存而外物不與焉昔者孔子之門有以浴乎沂風乎舞雩言其志者矣非有自得乎其中則夫所待以寓其樂者曾何異於山中之白雲乎雖然濠上之遊魚之樂莊子不必知也莊子之不知魚之樂惠子不必知也白雲之可怡悅與否賢主人固無庸知之而賢主人之自樂者予亦不得而知也而安能言

之姑識其與客語者如此主人赫魯其氏台哈布哈其名  
嘗以嗣襲長萬夫云

巽菴記

餘姚楊君名其宴休之室曰巽菴而徵予言所以名之  
義夫巽之義聖人之作易既言之矣其又奚言顧君之  
名其菴者不可無辨焉耳蓋菴也者山林枯槁之士木  
茹澗飲而託焉以休其身者也巽之為卦其彖辭曰利  
有攸往利見大人其象傳曰君子以申命行事由是言



之則離世異俗者固無用乎巽矣而況君遭時承平方  
以材見推擇且寔有顯職宜其席不暇暖寧能久居此  
耶雖然觀象玩辭居者之事也君退而家食藏修游息  
于斯其於有攸往見大人者揆之必至審而於申命行  
事者究之必至悉動則觀其變玩其占而已以言乎變  
則巽自遯來遯而為巽四乃得位得位而近君其動之  
占所以悔亡而有功者四以一陰處四陽之間而上順  
於五皆以正而相得巽之善者也君果遯而不變者乎

誠使之進居近列必有以處此矣豈若山林之士離世  
異俗木茹澗飲嗒然休其身而無所用心也哉抑予聞  
聖人之言易取義非一端是故巽為有攸往見大人申  
命行事而或為隱或為伏竊懼昧者疑君之寓迹乎茲  
菴有類夫以潛隱屈伏為巽者於是乎言

江浙行中書省題名記

昔太史公於漢之將相名臣不皆立傳而為之表悉著  
其氏名歲月使覽者尚論其世而有以知其人後世官

寺之題名實本於此故雖偏州下邑無不記諸其廳壁  
江浙行中書省莅治錢唐五十又六年題名有記尚矣  
至正二年夏四月省署燬于災而石亦仆今丞相適下  
車亟使計工程材拓故址植廣厦增崇其壯觀以昭示  
平等威而未及蒐遺舉墜補題名之缺平章政事喀爾  
公視事伊始命掌故考舊牘合前宰執之氏名歲月伐  
石而大書深刻焉令潛叙次梗槩以告來者潛幸嘗以  
文字為職業而效趨走於屬部何敢以不敏辭載惟我

朝稽古建官以來厯臣碩輔入則保茲天子而儀刑乎  
百辟出則正是國人而屏翰乎四方體貌之尊內外均  
一所以聳萬民之具瞻折千里之遐衝也今天下為行  
省凡十有一而江浙當東南之都會生齒繁夥物產富  
穰水浮陸行紛輪雜集所統句吳於越七閩之聚訖于  
海隅旁連諸蕃椎結卉裳稽首內嚮挈兵民二枋而臨  
制於邇外事任至重非元勲懋德兩有文武莫克膺其  
寄丞相繇中書平章政事進位端揆來鎮茲土紀綱號

令煥然聿新羣工庶尹奔走率職賜履所及咸為之改  
眎而易聽皇上嘉其有興壞起廢之功特勅詞林宗工  
作記并書篆以賜一時宰執大臣都司僚佐亦已衣被  
昭回之光而流榮耀於無極若夫題名之設蓋他日表  
將相名臣者之權輿是宜與蘭臺秘閣之所纂名山金  
匱之所儲相為經緯氏名歲月之存否所係甚大豈偏  
州下邑廳壁所記可槩論乎然竊聞溫國司馬公記諫  
院題名以為居是官當志其大舍其細先其急後其緩

專利國家而不為身謀有言責者固不容不事斯語充  
乎是道雖秉國之均任天下之重無難也則其為記又  
不徒取氏名歲月之可見而已矧今聖神撫運鉅人並  
生更進迭興均其勞佚猶有虞之九官奮庸於內成周  
之三后協心於外畫一之治罔間後先述作之家遡觀  
其時而睹其餘澤之未泯指事載功垂之竹帛不亦廟  
堂推美讓善追紀前人之盛心也哉

江浙中書省左右司題名記

中書之有行省行省之有左右司國朝之制也蓋自唐分三省肇置都司為尚書丞轄之貳以天下之大百官之衆而任是職者止於十人其選不輕矣攷之六典則其所掌付諸司之事舉正稽違省署符目執直簿以知省內宿直等厯厯數事而已位有常員職有常守也今政本一歸於中書而以左右兩司為元僚小大之事罔不與聞列曹掾有所闕白得持文墨議論相可否僉議既定乃以聽都堂之裁決而署行之較之往昔事權輕

重固大不侔其在行省曰郎中曰員外郎曰都事官稱  
命秩悉視中朝宰士而恩數無內外之異合左右為一  
司以兼總乎六曹而分守無彼此之殊位序已崇而職  
務尤劇委任之重負絕前比非清方敦實閱敏周通之  
材莫宜居之由是而歷從班登政地者踵武相望號為  
宰相之儲誠要官之高選也學士大夫徃徃觀乎題名  
而指其顯融於時能以雋功偉烈自見者侈為盛世之  
美談安可無以考其去來之歲月哉江浙行省左右司



重新於災燬之餘爰命潛記其題名而刻諸廡下潛竊  
惟古之記題名者不特以謹歲月必因其所居之位而  
寓規誡焉今之都司上以彌綸乎相業下以綱紀乎曹  
務至於邊隅之阨塞閭閻之幽隱靡所不當問非若羣  
有司效一官守一職而可以一事名言也庸叙次其設  
置之沿革以為之記凡叅贊之功有可稱述而非題名  
所能盡記者茲不得而詳焉

義烏先達題名記

義烏邑庠禮殿之西南故有文昌祠宋先達題名在焉  
祠廢而石毀已久至正七年春主教事者暨先達諸公  
之後人始復修其祠事而買石重刻真其中昔我世祖  
皇帝既定天下于一萬邦黎獻共惟帝臣特旨以宋咸  
淳甲戌進士第一王公龍澤為行御史臺監察御史公  
邑人也鄉大夫先生莫不動色胥慶以為科目之設茲  
其權輿逮仁宗皇帝臨御伊始承平寢久文運之開適  
惟其時誕布詔條光揚祖訓著貢舉令以興賢能法行

於延祐之初而兆見於至元之末公之用舍乃科舉廢  
興之幾名不稱則無以風厲乎四方菟其缺軼而表顯  
之不獨為一邑之榮觀而已矧今聖天子在上稽古右  
文分命儒臣撰定前史因其善惡以寓勸懲列傳所載  
盡瘁事國如忠簡宗公正色立朝如文清徐公皆邑之  
先達也覩其名而知感慕激發則兩公不得專美于前  
而後賢之踵武相接又豈止為科舉之士哉是宜有以  
彰千載之盛際非徒可存一代之故實云爾詩曰自古

在昔先民有作遺風餘烈固未泯也又曰高山仰止景行行止吾儕小子敢不勉諸題名舊刻潛之曾大父左曹公實志之茲俾潛嗣書其重新之歲月潛不得辭也

義烏縣學明倫堂記

義烏故有先聖廟在縣南宋慶歷中徙于縣東而立學以應令崇寧初命縣皆置學又徙于縣西尋燬于寇今廟學在縣北則紹興間所徙也其後又斥廟西地以為學而規制寔脩逮入國朝有司以時繕治惟謹天歷二

年冬達魯噶齊特哩始盡撤而新之奧殿邃廡夷庭穹  
門崇高修廣悉倍其舊且改作論堂直廟之北墉面勢  
甚正而地脉隱隱隆然以起堂適據其脊或挾宮宅地  
形之術審其方向謂宜避勿犯由是未及就緒而遽輟  
工後來間有不為其所怵者率憚於役殷費鉅罔敢自  
任顧假術者之言以為解閱歲滋遠莫或以動其意至  
正三年夏五月縣尹周侯自強來蒞事展謁而退覩斯  
堂之暨茨不施歌仄敝漏殆將覆壓問其故而為之太

息亟令鳩財僦功易其已壞而補其弗具朽墁甃甃必  
堅必良棟桷豐碩櫺檻顯敞飛櫟步簷周于四阿左右  
齋序為屋十間基而未構者半完舊益新畢潰于成什  
器之須待用無缺先賢之祠曰忠孝堂寓於廡下則遷  
而位于廟之西南巨石偃蹇當乎前軒則因其自然輔  
以土壤及它山之石使就平坦甃其上為杏壇修五十  
尺有奇而廣加其修五之一始事於是年之冬訖役於  
明年之春主教事者欲圖賢侯之績俾永勿墜爰狀其

實屬潛記之蓋古者惟有學而無廟後世或有廟而無學廟學之制莫備於今詔書屢下風厲作成視昔有加可謂盛矣義烏為名縣其有學亦已久夫何一旦倏興忽廢春秋行事駭奔走執籩豆濟濟在列而考德問業羣居游息皆無其所弦誦之聲希闊寂寥幾若向之有廟而無學何以廣教道稱上旨哉宜乎周侯鰓鰓焉致其力而不卹於流俗也凡先王建學明倫之本意與是邦人材風俗文物之大槩有晉陵胡公理鄉先達朱公如

璋陳公炳及潛之六世祖處士君所為記論著已詳石  
多不存而其文並傳於今未泯潛不敢勦取前人成說  
以瀆告于同志之士姑為記其顛末如此俾來者有考  
焉

徐偃王廟碑後記

衢州徐偃王廟有韓愈氏所為碑文其別廟在今蘭谿  
州者里人徐畸實為之記畸辨其未嘗稱王而建安素  
聘儒記江山之別廟直謂孔孟之徒無道偃王事者古



昔帝王事蹟不載於經而雜出於傳記百家之書固多矣況偃王事見司馬遷史記范曄後漢書張華博物志本末甚具至愈之文出而學者家傳人誦之偃王仁義之心遂以暴白於天下後世由愈之言可信不誣也若愈者非所謂孔孟之徒歟衢人柴某家于蘭谿既與州之士民修其祠事且摹刻愈碑文立石殿廡而屬潛志其歲月於下方潛竊惟湯武以仁義興偃王以仁義亡興亡雖異其為仁義未始不出於心之同然是州之人

誠能於愈之言信而不疑則其致力於神將弗懈而益  
虔祥慶之來下蔭庥之所加未有止也庸附見畸聘儒  
之說而論次之庶覽者得以詳焉

忠簡宗公祠記

義烏滿心寺鍾記宋名臣忠簡宗公之文也石毀弗存  
已久寺僧曰直曰謚實公七世諸孫直先示寂謚今以  
甲乙之傳嗣為住持爰輟衣盂之資購田若干畝祠公  
於西廡探家集得舊記重刻諸石而俾潛志于下方謹

按公諱澤字汝霖世為義烏人元祐六年中進士第調  
館陶尉歷龍游膠水趙城令政和三年改官知萊州掖  
縣差通判登州忤道士得幸用事者既丐祠而歸猶坐  
削奪羈置鎮江因卜居焉經郊恩叙復監鎮江酒靖康  
元年以臺臣薦召對假宗正少卿充和議使公奏名不  
正更其名計議使訖不行會選易河北帥守乃擢公直  
祕閣知磁州河北義兵都總管就遷祕閣修撰高宗以  
親王奉使過磁公力止之朝廷即授以兵馬大元帥公

為副元帥暨高宗正位宸極命公以龍圖閣學士知襄陽府俄徙知青州又徙知開封府遂以延康殿學士為京城留守兼開封尹陞資政殿學士公方身任中原之事時宰忌公者從中沮之公以憂憤成疾而薨建炎二年也有旨拜公門下侍郎御營副使而遽以遺表聞詔贈觀文殿學士尋賜謚忠簡公階正郎卹典初行止用侍從恩數進四官後乃以通議大夫告其第累加至開府儀同三司云公墓在鎮江之京峴山而立廟於鄉郡

從祀於邑庠並著為有司之彞典謚之生上距公歿二  
百餘年且去家為浮屠而不忘乎賢其賢親其親祠事  
之興又禮之以義起者也潛是用序次其作始之自并  
以公官伐之槩系焉公平生大節及功施于社稷者有  
傳在國史有遺事行於世茲不書

重修釣臺書院記

漢嚴子陵先生會稽餘姚人史稱先生少與光武同遊  
學光武即位令以物色訪之得於齊國拜諫議大夫不

受去耕於富春山按圖志是時齊為郡而未為國其遺迹已漫不可考今建德之桐廬實富春故地先生釣臺在焉所謂嚴陵瀨也不獨以嚴名其地而且以嚴姓其州先生高風盛烈之所存於此為最著崇立而表顯之使人知所嚮慕奮發不亦為民師帥者之職歟釣臺有祠剏於范文正公作州之日而重新於蕭侯燧其有書院則自陸侯子適始更王侯似趙侯汝歷規制乃備國朝仍其舊設師弟子員而鄰僧怙勢悉奪其恒產以為

已有訴之於官僅復其半所食者瘠田五十畝而已間  
嘗入錢佃其旁官山三十頃取鬻薪之奇贏以佐營繕  
之費豪民欲擅其利構訟連數歲不決至正元年秋總  
管羅公下車首務修明學政偶閱其牘亟命度其地之  
肥磽均而為二俾分佃之咸以為平而各安其業山長  
沈元鼎方謀銖積寸累以興壞而起廢公復諭士人合  
私錢二千五百緡助其弗給土木之須靡不畢具元鼎  
尋書滿徐天麟繼之公以元鼎經畫有素留使同竟其

役會達魯噶齊高昌公適至與公併志壹慮臨視勸相  
馬寮佐亦克交贊其事而躬程督之勞則縣達魯噶齊  
伊拉瑪丹也屋以間計凡四十有九完舊者曰燕居殿  
曰祠堂曰清風堂曰招隱堂曰客星閣曰山高水長閣  
曰遂高樓曰羊裘軒曰懷仁輔義兩齋增新者曰三公  
不換亭曰天下十九泉亭曰錦峯繡嶺亭曰東臺西臺  
兩亭辟登臺之路而為門以識之又作門其外榜曰釣  
臺曰富春山庀事于是年之十月而訖役於明年之五



月寓公遺老來學之士共樂其成于是馬君泰之以書  
來屬潛識其歲月夫以二千石之重而荷承流宣化之  
任所以導揚上德扶世覺民者非可家至而戶曉也本  
諸名教樹之風聲待其目擊而心維氣感而機悟將有  
惕焉於中不能自己者矣諸君子藏修游息於斯顧瞻  
江山想像儀形聞先生之風而莫不興起尚無忘賢師  
帥新美之功哉若夫先生之行義與出處之大致見于  
前賢所論述者潛不敢贅陳也高昌公名間爾仕於中

朝歷章佩監中尚卿羅公名廷玉興和人以監察御史  
異遷江北淮東道肅政廉訪使今由兩淮都轉運鹽使  
來蒞茲郡云

海鹽州新作大成樂記

古之釋奠折俎升觴而已其為禮也畧故其用樂之始  
莫得而詳記曰凡釋奠者必有合也說者或以合為合  
樂然則釋奠之有樂其出于古歟若其音節器數則自  
漢儒未嘗言之前史所載元嘉之六佾特施于太學開

元之宮懸僅設於兩京政和造雅樂名大晟始頒行於天下而紹興著令郡邑釋奠其樂三成蓋至是而州縣學有事於先聖先師無不用樂者矣國家有因有革存其聲音器物之舊而變其稱號以新一代之觀聽今所謂大成樂是也海鹽昔為縣時既立學而廟祀孔子逮版圖入職方朝廷以其地大人夥易縣為州而廟學之制猶循其故禮具而樂缺有司以吏議所不責久寘弗講至正元年夏四月陳侯某來知是州首務興舉學政

問其籍則為士者百家為田者萬畝問其春秋之事則有牲幣而無樂侯為之惕然與寮佐延諸儒共圖之僉言儀真有周君者善樂事老而不仕寓迹于雲間欲正雅樂非君不可侯即俾持書幣迎致焉君曰樂以導和不和不足為樂僕觀江淮間所用樂雜出于伶人賤工之手器不中法音不中律左右高下參差混淆惡足以致和哉苟徒捐厚費而飾虛文僕弗為也侯曰作樂以和神惟君言是聽君乃為考其度數齊量範金為鐘而

協以古律管彼此適均吹其律而鐘自應至於琴瑟亦  
悉自製惟笙磬之屬擇善工使受指畫而為之集諸生  
三十有二人教之肄習而以明年春二月上丁合奏焉  
在列者無不欣豫於是教授陳某以狀來屬予書於麗  
牲之石用垂永久盖古之設教莫重於樂非止用于釋  
奠也侯之於樂不但欲辨其鏗鏘又必求通其義者相  
與討論之可不謂知所本乎諸君子從侯修其時事周  
旋升降於堂序之間必有聞其樂知其德而鼓舞于鳶

魚飛躍之下者矣是舉也有功於教道甚大非徒備其闕典而已可無書乎

德清縣學祭器記

德清縣學新作祭器成主簿潘君以書來曰縣有學學有廟尚矣前教諭蔣鈞所置祭器僅四十有九吾縣尹蘇侯之始至也首以興學為務勒褒封之辭以昭國典飾嚴奉之具以崇廟貌增廣生員而訓迪勸勵之尋用今教諭胡宗海之請按舊圖補造祭器之未備者百三

十有九罇爵簋簋豆登罍勺槃玷之屬如式告完費錢以緡計者千七百五十皆富而好禮之家慕嚮而悅助之者也蓋侯之撫民有恩馭吏有法而濟之以無倦今達嚕噶齊與侯下車同日克篤於寅恭之義併志壹慮俾伸其所欲為僕居其間雖無能為役亦左右交贊之故未及朞月而庭無滯訟姦豪屏息官府事益以簡餘力所逮自社稷壇三皇廟至於公署賓館亭臺庫廡以次畢新凡侯之所設施可稱道者非一而莫重於禮器

之大備願舉其所重為之記它善狀得以附見焉予惟古之釋奠為禮也略為器也容不必備今既廟事孔子在著令為中祀牲幣物器咸有定制其禮自朝廷達于四方而偏州下邑迫於米鹽細故日不暇給春秋之薦幸不廢而已蘇侯獨識其若緩實急而不苟於因陋就寡考儀文之缺而於器數之末有所不遺能盡其職分之當為而敬其事如此餘可知也庸弗辭而記之達魯噶齊名布埒齊河西右族蘇侯名靖世居濮之臨清潘



君名子陽予同郡金華人也祭器之目及助錢者之氏  
名悉列于石陰云

南山題名記

婺之宦學於杭者每歲暮春必相率之南山展謁鄉先  
達故宋兵部侍郎胡公墓仍即其廟食之所致祭焉竣  
事遂飲于西湖舟中以叙州里之好大德八年春三月  
癸亥會者四十有四人魏國趙文敏公時方以集賢直  
學士領儒臺潛幸獲從先生長者之後而趨走於公履

履之末逮今三十有九年乃以非才補公故處暇日從鄉僧游龍井覩公舊題而與道其故事咸謂不可久廢而莫之舉亟以白于宣政副使王公合同郡大夫士暨方外交四十有一人以至正二年春二月癸亥復會于南山追數向之四十有四人存者殆無幾或顯融於中朝或隨牒調補於遠方或已倦游歸休於家林惟潛忝有祿食于此而得齒茲盛集未知後二十有九年今之四十有一人重來者誰歟古人云後之視今亦猶今之

視昔此題名之所為作也諸公謂潛宜題識其首是用弗讓而直書其歲月以俟後之覽者焉

通濟橋記

婺瀕溪為郡二水薄城南合流而西其勢滋大距城一里所故比舟為浮橋以達往來霖潦暴溢絀弱弗支舟數敗散水湍悍不容篙艣或有急而冒險以進多致覆溺西峯及菴禪師憫人之病已甚謀伐石作橋以利永久禪師名德之重尊官大吏豪商富民莫不慕嚮之輸

財薦貨狎至宣慰使哈喇岱金吾公為移閩閩徵善工而授役焉度地於浮橋西若干步排積沙以定其基布橫木以實其底繫石于淵者十有三旁為兩隄中為十一頓凡頓之形西正方東則小擗而剡其上以殺水怒起大德四年秋九月訖十年春三月兩隄十一頓皆集未及架木為梁而禪師遷湖之道場尋委順示寂杭游民沈甲斷髮為頭陀走京師給權貴人言我及菴弟子願假外護以畢橋事權貴人不知其詐為請于東朝既

得請南還則並緣取民財奪商人木衆共患之郡長吏亦遭其凌侮而弗堪也乃發其姦陳之臺司以聞于上正其罪沒入其錢遂罷橋局而毀石頓石堅緻不易動僅仆其五而止延祐元年冬十有二月也禪師之法子雪牛芻公嘗以橋不可廢訴於官議久不決元統二年春部使者徐公甫下車即詢民間利害當興除者未幾友雲龍公時主西峯法席亟以茲橋為言徐公矍然謂人之為民害者宜繩以法橋以利民不宜因人而廢親

署公牘為申明之未報會徐公入叅議中書省事白於宰相執政咸以為橋梁與不急之役異詔旨甚明有廢必舉無可疑者符下龍公首罄衣孟以倡興作江浙行中書省既給以前所没入之錢二萬餘緡行宣政院亦命開壇集衆僧受具戒得香幣之資為錢五萬緡乃市大木於處之遂昌募良匠於閩南江左以至正二年夏四月庀事今工部尚書慶喜公前刑部尚書張公並持部使者節而來躬蒞視之且輟俸金以增役費寮佐及

所部吏民欣助恐後二公復併志壹慮殫其勸相呈督之勤於是諸頓悉完頓之高去水四十有一尺貫以木梁被以石甃高出頓上又八尺而橋成橋之修七百八十尺廣若干尺覆以屋如其修廣楹間五十而為殿者三為亭者二殿以妥觀音大士泗州僧伽立上帝之神亭以寘四天王因浮橋之舊名榜曰通濟其年冬十月既望張公率憲府暨文武官屬以落馬坪來俾為之記古者辰角見而雨畢則除道天根見而水涸則成梁

有司歲一治之耳是役也溯其造端之始已不啻四十年而一作一輟卒有待乎任風紀者力振舉之援著令以從事乃克就緒其廢興所繫固非有司之常事可以槩論夫何以措其辭哉昔泉州守蔡公記萬安渡石橋第叙役要而不及其它蓋春秋之法所謂直書其事具文見意者也其不佞敢竊取斯義考其廢興之故而備記之用謹歲月貽諸後之君子云爾

博古堂記



故翰林待制僉淮西江北道廉訪司事申屠公至元間  
名御史也公平居無它好玩惟見以古彝器法書名畫  
求售者輒援厚直取之所蓄既富緘縢度置覆以傑屋  
名曰博古之堂公歿逮今闕十有闕年嗣子耀州使君  
傳藏護視惟謹升其堂如見其親之存焉間嘗諭于某  
曰我先君燕休之所曰九思堂吳文正公實為之記別  
號忍齋則翰林侍講學士揭公記之武昌別業有窮谷  
則翰林待制柳公記之作樓以儲書曰墨莊則翰林學

士承旨歐陽公勒銘其上獨博古堂僅存治書侍御史  
李公魏國趙文敏公所書扁榜而未有為之記者幸畀  
以一言俾我後人永保而勿墜不亦可乎某生也後不  
及從先生長者登公之堂而區區陋微於諸大老無能  
為役然托雅故於耀州非一日安敢以不敏辭昔者孔  
子言夏殷之禮而謂杞宋之文獻為不足徵當孔子時  
杞用夷宋圖霸已久典籍散亡而賢人之存者無幾其  
不足徵尚何恠乎秦人焚詩書而博士所掌故無恙蕭

何從沛公入咸陽第能收其丞相府圖籍以知天下阨  
塞戶口多少強弱之處至於先王之舊典儀物則一切  
委棄弗顧而墮於楚人之手以同歸於煨燼有識之士  
所為追恨痛惜而不已也國兵南伐趙氏納土既封其  
府庫以入于有司而一代之儀章物器皆公為江浙宣  
閩都司時親受於其主者以上于朝廷武夫俗吏莫敢  
壞傷斷簡殘編亦靡亡失其有功於斯文甚大中原文  
獻流落東南者固不得比隆夏殷公之賢於蕭何則已

遠矣而又能以餘力窮搜極訪因山巖丘隴屋壁之遺而窺見昔人制度法象之所寓精義之所存公之有志於古豈徒以資耳目玩好而已哉矧以耀州為之子克謹其承久且弗忘不待當祭而齋然後思其居處思其所樂思其所嗜也來者詎可忽諸公諱致遠字大用東平壽良人其歷官行事有永國文康公所為碑銘此不著耀州名嗣以清方直諒世其家云

述古堂記

吳郡繆仲素好古博雅之士也平生所嗜惟古器物卒  
然遇之輒購以重貲並寘一堂之上其目若干所寶用  
者有宋內府故藏紹興丁巳邵諤所進述古圖圓研因  
以述古名其堂而求予記之述古圖本李伯時效唐小  
李將軍用著色寫雲泉花木及一時之人物按鄭天民  
先覺所為記坐勘書臺捉筆而書者為東坡先生喜觀  
者為王晉卿凭椅而立視者為張文潛按方几而凝竚  
者為蔡天啟坐盤石上支頤執卷而觀畫者為蘇子由

執蕉簟而熟視者為黃魯直凭肩而偶語者為陳無已

據橫卷而畫歸去來圖者為李伯時按膝而旁觀者為

李端叔跪膝俯視者為晁無咎坐古檜下擘阮者為陳

碧虛袖手側聽者為秦少游昂首而題石者為朱元章

竚立而觀者為王仲至坐蒲團說無生論者為圓通大

士偶坐而諦觀者為劉巨濟凡著幅巾者十有一人烏

帽者二人而其一為道帽僊桃巾琴尾冠者各一人衣

深衣紫衣褐衣者各二人青衣者四人黃衣者三人而

其一為道服繭衣紫氅驂衣各一人一童執靈壽杖一  
童捧古研兩女奴雲鬟翠飾則王晉卿家姬也石床錦  
褥玉卮瑤琴以次陳列大谿峭壁恠石淙流曲徑危橋  
映帶左右松竹蘭蕙紅蕉紫葳陰翳聯絡天民又謂有  
羽流名動四夷師表千古伯時偶未之及乘間寓意繪  
而為圖以資好事之玩莫知其所指為誰記作於政和  
甲午後一十又三年諤乃以研進研蓋端溪紫石其形  
正圓隆其中以受墨環其外以為水委而旁刻茲圖其

物采雖不可辨而服飾位置猶彷彿可覩所謂述古圖  
圓研也予聞商書記遲任之言曰人惟求舊器非求舊  
惟新夫所以欲求器於新者豈忽遠而貴近哉取其新  
以適於用而已三代先秦古器徃徃流傳至今使兗之  
戈和之弓垂之竹矢離磬崇鼎一旦歸于士庶之家固  
無所用惟研也者自王公達於庶人所通用也矧茲製  
作之妙備存人物儀刑之舊而其用則日新而不窮宜  
為仲素之所貴重歟堂以研得名記為堂而作仲素所



蓄有出於茲研之前而非堂之所以名者予不得而盡著也

西湖書院田記

昔天下未有學惟四書院在梁楚間今江浙行中書省所統吳越間之地偏州下縣無不立學而其為書院者至八十有五大抵皆因先賢之鄉邑及仕國遺迹所存而表顯之以為學者之依歸不然則好義之家創為之以私淑其人者也獨杭之西湖書院實宋之太學規制

尤盛舊所刻經史羣書有專官以掌之號書庫官宋亡  
學廢而板庫具在至元二十有八年故翰林學士承旨  
徐文正公持部使者節涖治于杭始崇飾其禮殿而奉  
西湖上所祠三賢于殿之西偏行省以其建置沿革之  
詳達于中書畀書院額立山長員異時書庫官之所掌  
悉隸焉顧所以贍之者田皆薄瘠且遠在它州縣富歲  
所輸猶多不登營繕廩給之須猶或匱乏而弗繼未有  
餘力及其書也郡人朱慶宗以二子嘗肄業其中念無

以報稱乃捐宜興州泊陽村圩田二百七十有五畝歸  
於書院遵著令減其租什二實為米一百三十有二石  
請別儲之以待書庫之用而毋移它費凡書板之刊缺  
者補治之舛誤者刊正之有所未備者增益之主教事  
者既白於儒臺而轉聞於憲府俾有司蠲其田之徭役  
慮後人昧于所自而墮其成規徵文為記以示永久昔  
蘓文忠公記李氏山房藏書以為物之悅于耳目適于  
用而不敝不竭隨人之才分求無不獲者惟書耳李氏

于其書既取而用之而書固自如未嘗少損也夫書誠可悅而適用不敝不竭矣使傳刻者歲滋久而嘗無弊則摹造者日益廣而豈有竭哉向之書院若白鹿洞若嶽麓非朝廷所賜無以得書今也以布衣之士而垂意于學校之事不患其居之不崇食之不豐而患其書之不完此仁者之心無窮之惠也學者宜無求而不獲能玩味其英華而究極其根柢者幾何人哉蘓公所以嘆古人得書之難而其學非後世所及後世之書多且易

致而學者益以苟簡也蘓公書院之先賢顯誦其說而推明之以為記庶幾來者主張是而勿廢且以勸夫束書不觀游談無根者焉

沈氏義莊記

湖之歸安東七十里是為花城為其鄉之望者曰沈君家故業儒君之父處士公遺外聲利不有仕祿而樂出私財以賑人之急謂親親仁民宜有本末次第首圖創義莊以教養其族人未及就緒而歿君以為前人之志

不可不續爰以至順辛未捐田五百畝建義塾構殿宇  
妥先聖先師像其中以春秋修釋奠之儀闢講舍齋廬  
延宿儒為之師而聚族之子弟俾隨材以受業鄉人來  
學者弗拒也尋復以至正乙酉捐田五百畝即義塾之  
南立義莊屋以間計者若干歲取其田之所入以實之  
擇族中之長且賢者同主其出納貧無以給昏喪諸費  
者量薄厚之宜制隆殺之等而周給焉大抵本於昔人  
之成規而微有所損益懼來者弗克嗣其事則以聞于

外宰相執政及部使者咸報如所請沈君既求里之寓  
公記其義塾而義莊未之有記乃叙次其事以屬筆於  
予古之有國家者必度田授民以厚其生立家收族以  
教之親愛自其法不行於後世而民之失其養者日多  
風俗亦日衰薄然而萬古一心萬心一理田制壞而此  
心不與之俱壞宗道廢而此心不與之俱廢仁人君子  
苟充其一念之良心推吾有餘資彼不足使得遂其生  
而發其油然親愛之心豈非禮之以義起者哉是則生

乎千載之下猶為三代之民也傳曰一家仁一國興仁  
一家讓一國興讓有能慕沈君之為而興起焉將見人  
各親其親而周宇之內無一夫不獲其所矣子子孫孫  
勿替引之善繼善述者所宜盡心也戚戚兄弟莫遠具  
邇秉彜之良心誰獨無之予弗辭而為之記者匪徒以  
勛沈君之後人纂承而弗墜亦以為富而好禮者之勸  
也

敏學齋記



吳郡施允文好修之士也築室於城東為齋居之所扁曰敏學四方士大夫來吳允文必踵門請見來者亦莫不樂與之遊會予將北上艤舟姑蘇驛允文來求予記其所謂敏學齋者予告之曰六經之言學肇見於武丁之命說而論為學之道曰遜曰敏而已遜者欲其謙退而如有所不能敏者欲其進修而如有所不及退則虛而受人進則勤以勵已二者固不容偏廢也孔子大聖人而不自聖故曰我非生而知之者可謂遜矣然而又

曰好古敏以求之者則其求之也曷嘗不貴於敏乎它日與顏曾二子言仁與孝而二子皆自謂不敏其遜抑可見矣回之仁參之孝三千之徒未能或之先焉豈真不敏者乎苟徒為自卑而不思所以自強是謂知退而不知進蓋遜雖美德然必敏則有功由是言之則為學之道所重尤在於敏也允文取以名其齋誠知所務矣而允文不自以為足汲汲焉欲求予言申其義以記之予聞孔子教人以訥於言而敏於行又以敏於事慎於

言為好學允文平居奉親孝交朋友有信敏於行與事者也因其所已能勉其所未至進進不已必有深造自得者焉奚以予多言為哉姑以此復于允文云爾是為記

閒止齋記

錢唐張子英生宦家且居今盛時而雅不樂仕進日以篇翰自娛尤嗜淵明詩摘其語扁所居室曰閒止齋而屬予記其所以名之義予觀淵明止酒詩章首即以居

止城邑逍遙閒止為言則其所謂止者不止於止酒而已夫天壤間事物有萬不齊是非之相傾利害之相乘妍蚩之相形強弱之相陵莫知其所終極而人以眇然之一身與之周旋而左右酬酢乎無窮之變孰能於膠膠擾擾中求其止乎山林枯槁之士棄事絕物而寓情於風月寂寥之鄉仰雲嵐而俯泉瀨若可以止矣是猶為有所待而未能無累於外也惟放於自得之場物任其性事稱其能而吾方且遺其所寄不知城邑之為山林

山林之為城邑斯可以無往而不得其所止此非莊生之所謂逍遙而淵明取以為言者乎抑其言不止於止酒亦不止於及其居止也坐止於高蔭而不知孰為輪奐之美步止於葦門而不知孰為康莊之達味止於園葵而不知孰為食前之方丈觀止於穉子而不知孰為侍妾之數百非去彼而取此也閒放不拘逍遙自適耳又安知孰為莊生之遊孰為淵明之止乎子英清修好古處城邑如在山林未嘗弊弊焉牽於名迹宜其聞淵明

之言而有契於心也然予聞孔子可以止則止苟未可  
以止而止與可以止而不止蓋胥失之當其可仕則如  
淵明以弦歌為三徑之資當其可止則如淵明之不為  
五斗米折腰解綬而去無累於物而異方同得何適而  
非逍遙是乃善學淵明而得其真止者也子英屬予記  
其為止之義予之所知若是而止耳昔者曾子以緝熙  
敬止釋止善與淵明以逍遙閒止詠止酒其取義皆非  
尋常枯於章句訓詁者所能通予方欲見好讀書而不

求甚解如淵明者共論斯事子英可謂淵明之流非歟  
倘能為予言之請留更僕而筆受之以為後記

記高祖墓表後

右迪功郎黃公墓表公潛之高祖其葬也宗正丞兼左  
司郎官朱公元龍方奉祠里居故我曾祖戶部公求為  
之文表于墓道曰迪功者宋紹定辛卯公以東朝慶典  
受封初階也後以戶部公景定間再遇明堂恩庚申贈  
宣義郎癸亥贈承議郎咸淳丁卯又以郊恩累贈朝散

卽高祖妣宗氏累封安人後公二十七年卒年九十有  
二曰孺人者亦其初封也子男四人長諱夢炎卽戶部  
公是為潛之曾祖幼能屬文年十有一鄉先生或戲謂  
曰小甘羅之一歲早已能文應聲曰加孔子之數年可  
以學易鄉先生大奇之表所謂挑以文應口輒對是也  
既而以紹定戊子嘉熙丁酉連請兩浙轉運司文解表  
云再薦于漕者時猶未第也公歿後八年乃以免解擢  
淳祐庚戌進士第仕至太常丞樞密院編修官左曹郎



官以朝請大夫致仕後公三十年卒年七十次焱初戶部公客于觀文殿學士少師吳公淵假以男爵使就試於漕闈非其志也掇俚諺為啟以辭曰舉子忙槐花黃早已覺壯心之動時文熟秀才綠要須取本色而歸吳公嘉其志而不容其卒辭乃以回貶於焱後累遷忠翊郎權安慶府望江縣令炳蓋其舊名也後公四十八年卒年八十有五次煥所後父曰伯恭公之母弟次熒以公歿前一年補太學生後公二年卒年二十有八女二

人長適王困金嘉熙戊戌殿試第五人授從事郎昭慶  
軍節度掌書記未上而卒表不書帥鎮軍號而書州名  
曰安吉者取其易知也次適劉瞻孫即時孫也戶部公  
二子長垓次承節郎諱諤是為潛之祖一女適劉景辰  
有子應龜太學內舍生望江令三子長埴次塹咸淳已  
巳戶部公以明堂恩當任子輒推以與塹故戶部公之  
子無用蔭入官者塹未命而戶部遭內艱尋更名君澤  
以進武校尉試有司名不見于表者時猶未生也一女

適朱叔麒登咸淳戊辰乙科授從事郎處州軍事判官  
遷國子監書庫官太學一子垓生一女適劉璨垓生于  
嘉熙初元而承節公生于隆興寓舍表所書皆小字時  
猶未名也其後垓又改名景山云孫女實三人而表云  
四人莫得而詳也惟我高祖妣之葬戶部公所為壙誌  
有墨本傳藏至今而高祖墓表石弗存已久潛生于高  
祖既歿三十五年之後今七十始於朱公家集獲見其  
文追慕感泣不能自已大懼歲月寢遠墜逸不傳謹錄

而藏之并疏其纖悉委曲俾我後人尚有考也曾玄而  
下表所不及者家譜存焉

文獻集卷七上

謹案卷七上五頁前二行伊埒特穆爾舊作月魯

帖木而今改後倣此 二十一頁前八行達魯

噶齊舊作達魯花赤巴爾斯布哈舊作八時思

溥化今並改後倣此 三十一頁後一行赫魯

舊作合魯台哈布哈舊作泰不花今並改後倣


此 三十三頁前五行喀爾舊作康里今改後

倣此 三十八頁前一行特哩舊作鉄閭今改

後倣此 四十三頁後三行伊拉瑪丹舊作亦

刺馬丹今改後倣此 四十七頁後八行布埒  
齊舊作字蘭奚今改後倣此 四十九頁後一  
行哈喇岱舊作合刺斛今改後倣此





總校官庶吉士臣張能照  
校對官中書臣蔣寬  
謄錄監生臣王寶唐